

# COL

*Bulus a ci nuwa bu ponggu bu gwei Kolosi wa*

<sup>1</sup> Wuna lakargar baa bonggo Bulus, nere tu<sub>m</sub>andi Masiya Yesu wu Yamba seka cuunggi dangandi yei yi Timoti bagon yire.

<sup>2</sup> Yi boo balaman nuwa Yamba bu gwei Kolosi wa, ciyamba yuwa bu yi jire miringgi Masiya wa.

Yama boo niiu yi pidau gaanggu wu Yamba Mbaa yire ba siya kem yi mba.

*Bulus ceman kuru nuwa bu ponggu bu Kolosi wa*

<sup>3</sup> Kana dono jore du yi cegu kuru dingin mba, yi wanen Yamba, Mbaa, Mbaa Wu Gira Yesu Masiya yire,

<sup>4</sup> dingin yi nuu leegu jire mbiru miringgi Masiya Yesu yi kangam wu bu ningaman nuwa Yamba wa mwa mwa.

<sup>5</sup> Bu ninga yito dingin manam niiu wu nuwa ruu mbiro diyou, bu gacila bu nuu labar manam niiu a bonggo ciyei jirei, du twii ciyei du teng.

<sup>6</sup> Ciyei du teng du bambuwe a jegu gawuru, a giru a sima mwa mwa, ci<sub>k</sub>a ku ninggu buru a cu<sub>d</sub>u mbiri yake jor du bu nuwa pero bu kuranga boo nii Yambau miringgi jire.

<sup>7</sup> Bu tilanga bonggo Abaparas bagon wurai yire wu yi kangne, wu ning wurai Masiya yi jirei dingin yo.

<sup>8</sup> Yo sa yiri duu kangam ku bu ningi miringgi Bawei.

<sup>9</sup> Dingin tono, yake nyanggu ku yi nuu tu bu ningi, yaa ku lara cegu kuru dingin mba palaka Yamba ba twanga mbira yi somgu tu kasi bu ninga a bonggo somandi yi kurandi tu Bawei nyii.

<sup>10</sup> Dingin bu ninga pisu wu nyaau wu nyii wei giru Mbaa Wu Gira pero diramanu wei yo gaanggu, ninga mbire ba juki kana dono wurai du nyaai, yi giru miringgi somgu Yambau.

<sup>11</sup> Yi boo cegu kuru min, Yamba ba ciko mbiro yi kana wono dimbire cuunggi dimbire yo, wu yi yilau, palaka bu nyingga bogu gaanggu yi kanadi yi dirang gaanggu.

<sup>12</sup> Pero bu wananga Mbaa yire, yo wu diña bu yinno nyingga gedel kem yi nuwa Yamba wa bu miringgi lau ku rang.

### *Yesu Masiya a gwala kana ca*

<sup>13</sup> Yamba mira yiro kuu lau Balaa Buwai ku rim, a de yiwe kuu lau Bol yo, wu kangne,

<sup>14</sup> Wu waka yiro, pero a par siyei sukom welem yiru.

<sup>15</sup> Nuwa yaa kwei Yamba, anda Masiya wii yo wekilei Yamba wu nuwa yaa kwei wii. Wii yo woo yi dimbire a dwii tu Yamba ruwo mwa mwa.

<sup>16</sup> Dingin Yamba ruu yiringi mwa mwa a bonggo you, yiringi tu diyou yi tu simai, tu nuwa kwei yi tu nuwa yaa kwei, kana lau kana dimbire, kana balamba kana lauri, mwa mwa yiringi Yamba ruwo bonggo you pero dingin yo.

<sup>17</sup> Yo woo pu boo Yamba ruu bu yiringi mwa mwa, pero yo diini yiringi mwa mwa yoo a pisu pmau.

<sup>18</sup> Yo\_yoogi dwii buri, wu twii ikkilisiya. Yo\_too toson taawu kana ca, wii yo\_wu Yamba wun yo\_gawuriyo\_a boore, palaka a miringgi kana ca yo\_ba yo\_wu gira.

<sup>19</sup> Yamba kasa kana ku Masiya yoo\_nere, yo\_cimacima yi\_Yamba a kana wono\_nyinou mwa,

<sup>20</sup> pero a bonggo\_Masiya a sipa kana ca yi\_yo, kana yiri tu simai\_yi\_tu diyou, a de\_pidaugaaanggu\_bonggo\_pargu\_siyaui tiima ya a dwii yeu.

<sup>21</sup> Doo, mba bu kwaara yi\_Yamba, pero bu yoogi\_bacemba ya, dingin\_yiringgi\_tu bwii\_tu bu ningai pero bu danggai.

<sup>22</sup> Anda yoko\_Yamba diini Masiya ba yoo\_yi\_buri\_cika\_nere\_ba bwaa ba sipa mbira yi\_buri\_yei, palaka bu ninga walwal a gawuri\_yei, yaa dire pero yaa weleceu.

<sup>23</sup> Anda bu tiina leegu\_jirei\_mburu\_cingcing, bu laamani\_ya bonggo\_manam nii\_wu bu boo\_yi\_tono\_bonggo\_ciyei du teng. Too\_ciyei du teng du bu nuwa, du nuwa wasiman kana we\_a\_sima, wu mi\_Bulus n yoogi\_kewe\_n wasiya.

### *Wurai Bulus dingin Ikkilisiya*

<sup>24</sup> N woo\_yi\_buri degdeg dingin kuule\_wu n tiigu\_dingin\_mba, pero n kasi a buri\_mi n twanga tu\_nyonai\_cuunggi\_kuulu\_Masiya dingin\_buri\_yei su\_twii\_ikkilisiya.

<sup>25</sup> Mi n yoogi\_kewe\_ikkilisiya, dingin\_Yamba\_nyiinggi\_dingman\_yo\_dingin\_mba, palaka n\_sambiri\_ciyei\_Yamba\_cimacima,

<sup>26</sup> Ciyei\_Yambai du n sagumbiru\_doo, too\_tukugai\_yake\_ba\_doo\_doo, anda yoko\_Yamba\_juki\_nuwa\_ya.

<sup>27</sup> A bonggo nuwa Yamba bwii, Yamba sekā ba juku nyaau ku yi yilau ku tukugau, a miringgi nuwa bu yaa yoogi nuwa bu Yudaya wa, wii Masiya a pisu miringgi mbiri, manam niju wii yilau.

<sup>28</sup> Wii yo yi wasigu ciyei a dwii yei, yi ningaman kana we dikacene, jukugu kana we yi somandi yiri mwa mwa, palaka yi de kana we biigi a miringgi Masiya.

<sup>29</sup> Dingin toño n ningi wurai yi kwasan kwii, yi dimbir Masiya wu wurai miringgi mi.

## 2

<sup>1</sup> Too tu diina n kasi bu som kwasang kwiiu wurai du n ninga dingin mba, pero yi pma bu Laudikiya wa, yi bu tii bu kogu mu wa.

<sup>2</sup> N ninga yito dingin n kasi pma ba ciko buri miringgi gaanggu pero ba neca dwii miringgi kangam, palaka pma ba nyingga wuure, jor du pma kuranga pero pma lee yi jire, pero ba som tu tukugai tu Yambai, wu wii Masiya.

<sup>3</sup> Yo wu mwa mwa nyaau somandi yi kurandi tukugi miringgi yei.

<sup>4</sup> N sagumbiru too yiringi palaka kana we ba wele mbir ya yi cewi tu cika jire anda twii leendi.

<sup>5</sup> Kana pu n yaa kem yi mba miringgi buri ne, anda n woo kem yi mba miringgi bawei, pero n woo ningi buri degdeg ku n nuu pongondi mbiri yi pitu mbiru miringgi leegu jire bonggo Masiya.

*Param buru miringgi Masiya*

**6** Yake ku bu lee Masiya Yesu too Mbaa Wu Gira, bu ninga pisu naapu yi yo pero bu ninga pongondi yi yo.

**7** Bu ru swandi pero bu mo buri miringgi yei, yi pitu yi dimbire miringgu leegu jire mbiru cika ku yi juku mbira, bu ninga pu wandima.

**8** Bu ruun tuwe kana we ba dii mbiri ya bu ninga pongondi yi somandi tu nyoi, tu twii ciyendi yi dangandi nuwai. Tu pma jukugu twii teeringi tu simai tibak, twii tu Masiya ne,

**9** Dingin a miringgi Masiya, Yamba juku buri yei cimacima yi yo,

**10** pero a bonggo naapu mbiru yi Masiya, bu yoo nuwa bu twanggi wa, yo wu jeegi lau dwii balaamba yi dwii dimbire baweingi mwa mwa.

**11** A bonggo naapu mbiru yi yo, nuwa mwar mbiri gwane, twii mwargu gwane ku nuwa ningi yi wai ne anda kwii ku Masiya. Yo dema mbir ningandi buri.

**12** Jor du nuwa ningambiri batisima a ninga cika nuwa tin mbiro kem yi Masiya, pero a jor du nuwa wun mbiro batisima a ninga cika bu wunongo kem yi Masiya bonggo leegu jire mbiru yi dimbir Yamba, wu wun Masiya a boore.

**13** Nang bu cika nuwa bu bwanggi wa dingin welemdi mbiri, dingin gaanggu mbiru twanggi yi welemdi, anda Yamba nyimbiri piima kem yi Masiya, pero a para sukom welemdi yiri mwa mwa.

**14** A deman siyei bali su dwii yiri dingin dwal pongondi yi teeringi nuwa bu Yudaya wa, Yamba demana bonggo piingga yeu.

<sup>15</sup> A gwala dimbir baweingi yi wu lauri, a dwiiyanga pma melma a gawuri nuwai, a gwala dimbiri pmo a dwii yeu wii.

<sup>16</sup> Dingin tono, bu lee ya kana we ba ko mbira yi welem dwii yiri tu bu jei kana tu bu nai, kana dingin bu yaa ningi waandi su pma ningi, kana waandi pwalau ku pucu kana cwaagu nyanggu Sabadu.

<sup>17</sup> Too wekilei yiringi tu too baayi, anda Masiya wii yo wu manggu.

<sup>18</sup> Dingin tono, bu lee ya kana we ba dii mbira bu ninga cingon dwii wu leendu, yi kuraman sima bacamandi, ka bu pong tu pma jukugi yaa ku bu kinggu wei woriri tu Yamba ninga mbir alkawal. pma cegu kin, pma ko somdi a dwii too yiringi pero gaanggiri pmai tu bwii ciyeni pma ba gira dwii.

<sup>19</sup> Koo duu nuwau yaa naapu yi Masiya, yo wu twii dwii buri. Masiya wii yo neca buri swii mwa mwa ba yoo tu tiinoi, cika ku penendi yi kiri neca buri, ba gira cika ku Yamba kasu girau.

<sup>20</sup> Yake ku bwaanga kem yi Masiya a pera mbira a bonggo ponggu teering tu simai, dingin ca karai kwii bu ninggu pisu cika nuwa bu pong teering tu sima wa,

<sup>21</sup> cika teeringi tu ce kin, <<Bu tari ya! Bu tii ya! Bu mwani ya!>>?

<sup>22</sup> Too yiringi mwa mwa tagi ba bwiwa, dingin too teeringi, yi yiringi tu nuwa jukuri.

<sup>23</sup> Pma dangandi kin too teeringi jukuri pwii, diini pma ba ninga kwasan kwiui pala ba jukuya kin pmai ponggu Yamba ku dinggu, diini pma cingon dwii ku leendi, diini ba turongo buri

pmai wang, anda yaa dimbire ba ja pma tumgu  
ningandi buri tu bwii.

## 3

### *Pisu wu pucu*

<sup>1</sup> Yake ku bu wunongo kem yi Masiya, bu man nii a yiringi tu diyou, pu Masiya woo pisu a pu yilau pu Yamba miru.

<sup>2</sup> Bu ninga dangandi yiringi tu diyou, bu ningi ya a dwii yiringi tu simai.

<sup>3</sup> Dingin bu bwaangi miringgi ninga buri, anda piima mba tukugi kem yi Masiya bonggo Yambau.

<sup>4</sup> Nyanggu ku Masiya yo wu twii piima mba baa, mba mwaasi bu baanga wei kem yi yo miringgi yilau you.

<sup>5</sup> Dingin tono bu lara kana tono wurang buri. Ba bu taari, pusi, miyandi, kasigu yiringi tu bwii, yawo, wu twii kuraman sima buwai.

<sup>6</sup> Dingin soo welemdi sukom Yambau woo baayi dwii nuwa bu tum too yiringi wa.

<sup>7</sup> Nang kwii bu tum too yiringi, pu bu pisindi miringgi buri.

<sup>8</sup> Anda yoko bu lara too yiringi, ba bu sukom, cene, cere, bwiyanggu dinu, yi cewi tu bwii a nyandi mbiri.

<sup>9</sup> Bu mwaramani ya leendi buri mbiri, yake ku bu du ninga mbiru wu nang,

<sup>10</sup> bu yoo nuwa bu puci wa, bu wakuwa, too buri su puci Yamba mwe, yo wakugu ba yoo cika yo, palaka ba diina bu kuranga yo kundi.

<sup>11</sup> yake ku bu yoo nuwa bu puci wa, yoko yaa ner wu Yudaya, kana ner wu yaa yoogi ner

Yudaya, wu mwargi gwane yi wu yaa mwargi gwane, rungge, wu yaa pwiyagi, kewe kana wu yaa yoogi kewe, anda Masiya wii yo neca yiro mwa mwa.

<sup>12</sup> Dingin tono, mba nuwa bu Yamba seka wa, bu walwal bu kangni wa, bu yoo nuwa bu yi bunam wa, nuwa bu yi kalanggu wa, yi cinggi dwii wa, bubuk wa pero yi kanadi wa.

<sup>13</sup> Bu ninga kanadi yi kana we, pero ka wu kanggi bwiiya mbiri gaanggu bu paraman yo sukam, bu par siyei sukam ciaka ku Mbao Wu Gira par siyei sukam mbiri.

<sup>14</sup> Tu gwala mwa mwa bu ninga kangam, dingin kangam wii yo diini kana we ba teca dwii ku nyaau.

<sup>15</sup> Yama pidau gaanggu wu bonggo Masiya ba jee lau a gaanggiri mbiri, yake ku bu yoogi ner wiino, Yamba yi mbira dingin pidau gaanggu. Bu yoo nuwa bu yi wandima wa.

<sup>16</sup> Yama ciyei Masiya ba siina gaanggu mbiri kana dono jore, bu pir buri mbiri, bu ningaman buri mbiri dikacene yi pwii wang, bu pii pii lakargar piyangi, yi piyangi terenggu Yambai, yi piyangi Bawei, yi wandima bonggo Yamba miringgi gaanggiri mbiri.

<sup>17</sup> Kana ca tu bu ning wei kana bonggo cegu ciyei kana bonggo ningi, bu ninga tu nuwa bu ponggu Mbao Wu Gira Yesu ningi, bu wananga Yamba Kwiite a bonggo Masiya.

### *Pisu wu daa laa nuwa bu pongguwa*

<sup>18</sup> Nurumba, bu ninga pongondi yi bwiyamba mba ciaka ku daaya nuwa bu pongguwa ba ninga.

<sup>19</sup> Bwiyamba, bu kangman nurumba mba, bu ningamani ya pma cene,

<sup>20</sup> Kwaraa, bu ninga pongondi yi kwiimba mba miringgi kana ca, dingin too tu diraman gaanggu Mbaa Wu Gira.

<sup>21</sup> Kwiimba, bu bwiyamani ya gaanggiri kwaraa mba, dakali gaanggiri pmai ba yara.

<sup>22</sup> Kewaa, bu ninga pongondi yi bagiraa mba miringgi kana ca, bu ningi ya a nundi pmai tibak, ci<sub>ka</sub> ku nuwa bu kangga ningi dingin nuwa ba wandi pma, anda bu ninga yi gaanggu kiino bu nyiigu giru Mbaa Wu Gira.

<sup>23</sup> Kana ca tu bu ning wei, bu ninga yi gaanggu mbiru mwa mwa ci<sub>ka</sub> ku bu ningaman Mbaa Wu Gira, anda ner<sub>i</sub> ne,

<sup>24</sup> dingin bu soma bu yiru wei woriri tu Mbaa Wu Gira ruuman nuwa ya. Dingin Mbaa Wu Gira Masiya wii yo bu ningaman yo wurai.

<sup>25</sup> Kana we wu ninga tu yaa kundi yiru wei woriri tu yaa kundi, Yamba yaa seki.

## 4

<sup>1</sup> Bagiraa, bu ningaman kewaa mba tu [daaya] [cimacima], dingin bu soma min mba mwaasi bagira mbir woo diyou.

### *Dikacene*

<sup>2</sup> Bu kwasi kwii cegu kuru kem yi ruunggu tuwe yi wandima.

<sup>3</sup> Pero bu ce yir kuru, Yamba ba wun yiri nyinou yi wasi ciyei yei, palaka yi wasi ciyei du tukugai a dwii Kristo du nuwa twalangge dingin tonoi.

<sup>4</sup> Bu ce\_kuru\_n wasiya kundi cika ku daaya\_n ninga.

<sup>5</sup> Bu sindi siyandi yi pwii cudi nuwa bu yaa ponggu wa, bu ninga wurai yi jore du bu nyingai.

<sup>6</sup> Yama cewi mbiri ba yoo tu yi kalanggu pero teng kana dono jore, palaka bu puu nyiigu lee wu daaya kana we\_wu ninga mbir pira.

### *Cima bu cwata goro wa*

<sup>7</sup> Bagon yire Tikikus wu yi kangne, wu ningi wurai Masiya yi jire basin wurai yire miringga Mbao Wu Gira, sa mbiru wei kana ca a dwii mi.

<sup>8</sup> N woo\_tum yo\_bonggo mbiru palaka ba sa mbir tu yi miri pero ba ciko\_gaanggiri mbira.

<sup>9</sup> Baa wei kem yi Onisimus bagon yire wu yi kangne wu yi jire, yo\_wu twii bagon mbire. Pma sa mbiru kana ca tu pinai.

<sup>10</sup> Bagon mi Aristakus wu woo\_jarum woo\_cigu mbiru yi Markus wu kaka pmo kiino yi Barnabas woo\_cigu mbiru mwaasi. Wii yo\_wu n sa mbir ciyei a dwii yei min, ka baayi bu yiya wari rop.

<sup>11</sup> Jocuwa wu nuwa yir kin Yustus woo\_cigu mbiru mwaasi. Boo\_nuwa bu kunong boo\_a ninggu\_wurai Lau\_Yambau kem yi\_mi a cudi\_nuwa Yudaya bu ponggu wa, pma cingongin gaanggu.

<sup>12</sup> Abaparas kewe Masiya Yesu yo\_wu twii bagon mbiri, woo\_cigu mbiru. Woo\_cegu\_kuru yi\_kwasam kwiiu dingin mba, palaka bu tindi tiyei yi dimbire a miringga tu Yamba kasi bu ningai\_mwa mwa, bu siya twanggi pero bu yoo\_yi\_kurandi tu manggu.

<sup>13</sup> N kasi n sambira manggu a ninga wurai wang dingin mba yi nuwa bu gwei Laudikiya wa yi bu gwei Hirapolis wa.

<sup>14</sup> Luka wu yi kangne, nere wu pu nyinou yi Dimas woo cigu mbiru.

<sup>15</sup> Bu lam ciima muwa, ciyamba bu Laudikiya wa, yi Nimpa yi ikkilisiya wu laa you.

<sup>16</sup> Goro pu bu ce lakargar woq a cuqi mbiri, bu tumman nuwa bu ponggu bu gwei Laudikiya ba ce mwa, pero bu ce wu nuwa tumman nuwa bu .

<sup>17</sup> Bu sa Arkipus min, <<Ba kwasi kwii ma mata wurai du Mbaa Wu Gira nyii minai>>.

<sup>18</sup> Mi Bulus, n woobala mbiri binaa ciima yi wai mu, bu dangga mi miringgi cali, boo nii Yambau ba siya kem yi mba.

**Waja**  
**Part of the New Testament in the Waja language of**  
**Nigerea**

copyright © 2024 The Seed Company in collaboration with Language Developers and Bible Translators Association

Language: (Waja)

Contributor: The Seed Company

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-07-09

---

PDF generated using Haiola and XeLaTeX on 9 Jul 2025 from source files  
dated 9 Jul 2025

bc61fc0a-b349-5328-9699-9f7ae5bceaa7